



Il comitè d'organisaziun cun la presidenta Barbla Etter (2. da san.) e sias bunas gidantras

FOTOS L. JÖRG

60 onns Corporaziun academica Rezia a Friburg

Festivà il giubileum en il lieu da fundaziun

■ (anr/gc) 1957 è l'Academia rumantscha Rezia a Friburg sa constituida sco corporaziun academica ed entrada en la Societad da students svizzers (Schweizerischer Studentenverein). Ella era l'emprima e restada la suletta secziun rumantscha da la pli gronda Associazion svizra da students ed academichers catolics. Fin uss èn ses giubileums vegnids commemorads pil pli a Cuira e quai da cuminanza tras l'Activitas (students) e la Rezia veterana (anteriurs). Lezza è vegnida fundada 1958 per dar sustegn a la Rezia a Friburg.

Quest onn hai tutgà – per l'emprima giada – a l'Uniun dals anteriurs da la Rezia dad organisar persula il giubileum,

siond che la Corporaziun academica Rezia è vegnida dispensada (sistida) pervi da mancanza da commembers a la fin da l'onn passà. In fatg uschè trist, ch'è vegnì deplorà zunt fitg, sez sch'el è en il trend dal temp era per la SSS. Ils paucs Rezians èn alur s'alliads cun la CA Fryburgia, la secziun-madritscha da la Rezia, essend che blers students rumantschs faschevan avant 1957 part da quella. Percunter resta la Rezia veterana vinavant uniuncommembra da la SSS.

Festivatad mudesta

Cunquai che la Rezia activa manca ha la commemoraziun 60 onns Rezia gi lieu en in rom pitschen e patgific, sco quai

ch'ins ha pudì leger gia en l'invit. Igl n'ha pia dà ni in servetsch divin da festa ni il commers festiv e naginas delegaziuns d'autras secziuns da la SSS – sco quai ch'igl era adina usità tar tals giubileums.

Igl è vegnì purschì in program mudest, ma varià, e quai tut a Friburg. Ina pulita rotscha d'anteriurs ed anteriuras è sa rendida a la fin da l'emna en «lur» citad universitaria, dentant fitg sa midada visavi il temp da l'entschatta da la Rezia, mantegnend percenter sia atmosfera simpatica, cordiala e zunt apprezzada dals anteriurs.

Program varià

Entschavi ha l'inscunter per 60 onns Rezia il venderdi cun ina tschaina en buna cumpagnia. La sonda han entgins prendì part dad ina runda da golf ed auters fatg ina visita guidada a la citad, che ha rendì attents a bels e blers lieus da temps passads. Il past festiv ha gi lieu la sonda saira cun buna preschientscha ed empernaivla cumpagnia. Igl ha dà plirs plects, ma surtut chant, ch'è adina stà ina fermezza da la Rezia. La dumengia han plirs assistì al bel servetsch divin en la catedrala a Friburg e suenter prendì cumià.

Al comitè d'organisaziun – cun la presidenta Barbla Etter a la testa – èsi dad engraziar fitg ch'el han pussibilità da pudair festivar il giubileum 60 onns Rezia ed era procurà per insaquants muments nostalgics a Friburg, nua che blers students e studentas rumantschs han probabel passentà il pli bel temp da giuventetgna ed als è perquai restà tant a cor.



La corona a la festa giubilara.